

# Grondas visitas in onur

Giubileum da 90 ons Tessanda Val Müstair

**La Tessanda Val Müstair a Sta. Maria ha festagjà in sonda seis 90avel anniversari. Preschaints sper ils indigens e giasts sun stats eir ils giasts d'onur Ignazio Cassis, cusglier federal, e Christian Rathgeb, cusglier guvernativ dal Grischun.**

La manufactura Tessanda Val Müstair a Sta. Maria es gnüda fundada dal 1928 da Rudolf Filli, Floriana Andry e Fida Lori. Il bôt d'eira da mantgnair il manster da tessunza in Val Müstair e da pussibiltar ün guadogn per las pausas da la val. Quist bôt es hoz amo actual. Ils prüms ons da si'istorgia consistiva la Tessanda d'üna stüva da tesser sco bieras otras eir, ma be pacas da quellas han survivü. Cun dudesch lavuraintas a piazza parziala es la Tessanda Val Müstair, ingio chi vain tessü a man, üna da las pacas in Svizra ed ün bain cultural fich preschà pro la populaziun da la Val Müstair. La tessanda pussibiltescha il tesser tradiziunal per indigens e giasts, üna sporta unica in Val Müstair. Illa tessanda elavuran duonnas scoladas textilies preziasas cun talers chi sun bundant tschient ons vegls. Tuot vain fat a man e mincha prodot es unic. Ibsögna blier'esperienza vi dal taler per far exemplars da buna qualità. La lavur vi dal taler dumonda gronda concentrasiun. La tessanda spordscha eir la pussibilità da far üna scolaziun sco tessunza chi düra trais ons.

## Giubileum cun giasts d'onur

Bundant 240 giasts, personalitats da la politica ed economia, as vaivan annunchar per festagiar culs respunsabels da la tessanda seis 90avel cumplion a Sta. Maria. Tanter dad els d'eiran eir il cusglier federal Ignazio Cassis e Christian Rathgeb da la Regenza grischuna. Il president da fundaziun Peder Andri ha orientà als preschaints davart l'istor-

gia da la tessanda. Davo Andri ha salüda il president cumünal dal cumün da Val Müstair, Rico Lamprecht ils preschaints. «Vus badarat ch'eu nu discuor d'üna cuntrada periferica, causa cha quai es üna dumonda da la perspectiva. Per ün giast da Minca es la Val Müstair immez l'Europa e per ün Milanais immez las Alps», ha dit il cusglier federal Ignazio Cassis in seis pled da festa. Cur ch'el haja surtut la carica sco cusglier federal haja'l impromiss da s'ingaschar per tuot il pajais svizzer, uschè eir per las minoritads. «Important es per mai chi's recugnuscha il potenzial turistic da la stretta patria per avair success», hat dit il cusglier federal ed agiunt, «per giadair üna cuntrada intacta e quieta nu's stoja ir in Canada, quella as poja eir giadair in Val Müstair.» Ignazio Cassis ha portà ils salüds da Berna e gratulà per la buna lavur a favur da la Tessanda. Il cusglier guvernativ Christian Rathgeb ha manà il salüd da la Regenza grischuna ed el ha gratulà als respunsabels da la tessanda per lur ingaschamaint exemplaric. Sara Hauschild da la redacziun dal «Regionaljournal» grischun ha moderà la festa.

## Situaziun critica l'on passà

La Tessanda Val Müstair ha gnü da superar l'on passà divers problems. La situaziun d'eira critica e bliers tmaivan cha quella griss serrada. Ils novs respunsabels, a lur testa Maya Repele, han lavurà intensivmaing vi d'üna nouva posiziun da la tessanda ed hoz as preschainta quella in ün nov büschmoint. Eir ils prodots ed il sorti-maint dess gnir adattà per pudair lavurar in futur in möd perdüraivel. Repele es fich bainvisiva e respettada in Val ed ha organisà la festa cul sostegn da bliers voluntaris in möd professiunal. (anr/bcs)

Dürant seis sogiuorn in Val Müstair ha visità il cusglier federal Ignazio Cassis eir il Center da sandà Val Müstair e la Clostra San Jon a Müstair. Dapli da quista visita ed ün'intervista cul minister da l'exteriur daja illa «Engadiner Post/Posta Ladina» da gövgia, ils 12 lügl.



Il president da la fundaziun Tessanda Val Müstair, Peder Andri (survart) ha bignvgnatà al cusglier guvernativ Christian Rathgeb ed al cusglier federal Ignazio Cassis a la festa da giubileum. fotografias: Nicolo Bass e Benedict Stecher

# Nouva sfida per la directura dal Center da sandà Val Müstair

Judith Fasser ha surtut il presidi da la cumischiun strategica da la Biosfera

**Judith Fasser da Müstair rimpiazza sco presidenta da l'organ strategica da la Biosfera Val Müstair a Livio Conrad chi ha fin qua presidià la cumischiun. El s'ha retrat causa motivs professiunals, es però sco manader da l'uffizi forestal, amo adüna commember da quista cumischiun.**

MARTINA FONTANA

«Grazcha a mi'incumbenza sco directura dal Center da sandà Val Müstair, cugnusch eu a bod tuot la populaziun da la Val Müstair», disch Judith Fasser da Müstair. Cha quel fat saja stat ün dals avantags ch'ella haja resguardà sco important per surtour il presidi da l'organ strategica da la Biosfera Val Müstair. Ultra da quai saj'la fingià statta commember da quella cumischiun e perquai eir invouta i'ls affars ed i'ls differents progets da la Biosfera. Cha vairamaing nu saja capità nögla da special, per ch'ella haja surtut quel presidi. «E quai vulesse eir intunar», accentuesch'la. Ch'ella as vögla simplamaing ingaschar per la Biosfera. «Eu n'ha dürant ils tschinch ons cha sun uossa directura da l'ospi-

dal, gnü dachefar cun bliers sfidas. Üna da quellas es eir da manar il persunal e quai in ün bun möd chi maina a la fin eir al bôt previs», disch'la. Insomma: Ingüns dramas, ingüns problems illa Biosfera Val Müstair, oter co cha'l anteriur president ha miss a disposiziun sia carica.

## Trar insembel il timun

«David Spinnler es il nov mainagestiu da nossa Biosfera ed insembel cun el craj eu cha pudain prestar il maximum per nos sagè e nos s-chazi da la natüra», agiundsche'la. Chi detta uossa bainsci ün vent frais-ch illa Biosfera e ch'ella s'allegra fingià uossa, davo avair gnü il prüm inscunter cul nov mainagestiu, da pudair cuntinuar in quel möd. «Sperain ch'eir in avegnir as preschaintan nos dovoirs cun tanta capacitivanza e cuntantezza sco uossa», agiundsche'la riond. Ella ha però buna spranza cha quai es finalmaing eir uschè. Previs da müdar uossa blier, nun esa. «A mai staja simplamaing a cour da trattar las persunas chi lavuran e s'ingaschan per la Biosfera uschè, chi sun eir cuntaints e pon as verifichar cun quella», conclud'la.

## Plüss müdamaints pro la Biosfera

Quist on haja dat fingià plus müdamaints pro la Biosfera Val Müstair: Uschè es in marz gnüda müdada la cu-

mischiun da la part strategica da la Biosfera. Pierre René Grond, hotelier da Müstair es là nemp sorti da la cumischiun. Per el es lura gnü elet Daniel Pitsch da Tschiers. La cumischiun da la Biosfera Val Müstair cum-

piglia in tuot 14 commembers. Quels rapreschaintan tuot las gruppas d'interess dal cumün da Val Müstair e mettan adüna dacheu in vigur pro-

gets parzials chi vegnan fats in nom da la Biosfera. Il temp d'uffizi dal president o uossa da la presidenta, düra quatter ons avant chi dà üna nouv'elecziun.



Judith Fasser es la nouva presidenta da la cumischiun strategica da la Biosfera Val Müstair. fotografia: Martina Fontana